

J. P. LUCCIARDI



O Còrsi, cunservemu a nostra lingua, e imparemu a nostra Storia, se no'vulemu chi a Corsica possa dà torna omi cume Sambucucclu d'Alandu, Sampieru Còrsu, Pasquale Paoli, e Napulione.



## MANUALETTU

DI A

# STORIA DI A CORSICA



1925

IMPRIMERIE E. CORDIER & FILS  
BASTIA

25

MANUALETTU

DI A

STORIA DI A CORSICA

## A LA GIUVENTU CORSA

---

Rammintatevi, giovani Còrsi, chi prima di fà parte di a nazione francese, a nostra patria, a Corsica, è stata calpighiata più e più volte, e imposta a tributu da tutti i populi, antichi e muderni, chi currianu pe u Mediterraneu, in cerca di preda e di cunquiste.

A so situazione, u so clima, i so prudotti, piacianu a tutti, e ognunu ha circatu di prufittanne a e nostre spese. Sulamente, nisun populu si pò vantà — nenzu a Francia — d'avè mai pussedutu u core d'i Corsi, perchè hanu sempre vulutu cunservallu intattu pe a so mamma, a Corsica, ch'elli vulianu libara, indipendente, e prospera.

A nostra storia è una lotta d'ogni jornu, una rivolta cuntinua contru i tiranni e l'oppressori di a Patria, e sempre in favore di a santa Libertà e di l'Indipendenza.

Dopu tanti seculi di duminazione oppressiva e sprezzante, Pasquale Paoli avia riuscitu a ricostituì a Patria, a dalli una Costituzione liberale e democratica, e un guvernù justu e integru.

E' a storia di st'isuluccia cusì cara, o giovani Còrsi, che vi presentemu qui, tutt'affattu in ristrettu — un vidarete che le so cime splendurente, ma ancu assai più belle truvarete e valle e le campagne di stu reghione, si a curiosità vi decidissi a visitallu —, per dabbi un'idea di cos'ella fu in d'i tempi passati, prima ch'ella fessi parte integrante di a Francia. Vidarete quantu pudete esse fieri d'esse nati in stu paese.

A nostra più bella ricumpensa saria chi a lettura di stu libriciolu, vi dessi u gustu e a passione di vulè circà a cunosce in dettagliu, i fatti eroichi, e le vicende ancu dulurose di a storia còrsa ; ch'ella vi fessi amà cun più ardore — s'ell'è pussibile — quelli vecchj ch'hanu suffertu tantu pe a libertà, e chi so morti per vulè cunservà a so indipendenza, lascenduci un riccu patrimoniu di gloria, e di virtù civiche ; infine, ch'ella cuntribuissi a fabili ammirà, e soprattutto a esse di jornu in ghiornu più fieri d'elli, cunservendu sempre in core u so più caru e dolce ricordiu.

J. - P. LUCCIARDI.

# STORIA DI A CORSICA

---

## I

### A CORSICA IN L'ANTICHITÀ

---

A nostr'isula cusi verde e profumata, tutt'accinta da un mare sempre turchinu, a perla incumparabile di l'isule di u Mediterraneu,, chiamata da i Greci *Cirnu*, e da i Rumani *Corsica*, fu abitata — dappressu i monumenti megalitichi chi ci si trovanu — fin da i primi tempi di a più luntana antichità.

Ma un è pussibile — almenu pe u mumentu — a nisun storicu, anticu o mudernu, di pudè precisà qual'è statu u populu chi ci s'è stabilitu u primu, benchè tutti sianu d'accordu per suppone chi possanu esse stati l'Aryani o i Pelaggi.

I so primi abitenti, junti forse quandu l'isula facia ancu parte di u cuntinente auropeu, hanu duvutu abità piatti in di e grotte, e p'e fureste, cibendusi di frutti salvatichi, di culatu ch'elli trovavanu in d'i cavoni di l'erburi, o pe a macchia, e d'animali ch'elli chiappavanu cu e trappule e cu i lacci.

St'Isula di Bellezza, chi ha per curona i più belli giuielli di u mondu : Italia, Francia, Spagna e Algeria, truvendusi nantu a strada chi seguitavanu i populi orientali per corre a la cunquista, o a la preda di u mondu occidentale — Africa di u nordu, Iberia, Celtia — è stata sempre piaciuta e desiderata da tutti. L'Iberi e i Liguri ci hanu fattu scalu, e ci hanu suggernatu.

I Feniciani versu u XV° seculu av. J. C., l'Etruschi versu u X° i Focesi versu u VI°, e altri, ci si stabilinu per più o menu tempu, oblighendu l'Aborigeni a battersi cun elli, o a rifugiassi nantu e muntagne, o in d'i boschi più folti di l'internu.

Anch'oghie si ponu vede, o piuttosto induvinà, e vistigie di certe città fundate da se jente : Nicœa, Aleria, Alonia, ecc...

## II

## I RUMANI IN CORSICA

Più tardi, volse impadrunissi di a Corsica, ancu u populu gigante d'i Rumani, tantu per levalla a i so nimichi, i Cartaginesi, chi occupavanu certi posti marittimi, che per prufittà di l'abundenti e preziosi rivenuti in cera, pesci, e ligname, ch'elli ci cacciavanu.

Malgradu una decina di spedizione — 260 a 162 av. J. C. — cundotte tutte da famosi omi di guerra, a suttumissione un fu mai tutt'affattu cumpletta.

I consuli, o generali, più celebri chi piglionu parte a se spedizione funu : Luziu Scipione (260 av. J. C.), Liciniu Varus (237 av. J. C.), Claudiu Glycias (232 av. J.), Caju Masone (231 av. J. C.), Thalna (163 av. J. C.), chi morse di gioja quandu ricevi e felicitazione di u Senatu rumanu. Fu rimpiezzatu da Scipione Nasica, ecc.

Più tardi ; Mariu fundò a città di Mariana, e Sylla, fece riserei quella d'Aleria ch'era stata disertata.

I Còrsi vinduti come schiavi nantu i mercati di Roma, finianu per stancà, cu la so inerzia e la so indifferenza, ancu i padroni più indulgenti e più boni, i quali finianu per maladi i pochi solli chi l'eranu custati : Un Còrsu more piuttosto che vive schiavu.

Benchè u trattamentu fussi duru e l'impositi furzati, a Corsica ha gosu d'una certa tranquillità, e ancu di benessere sottu i Rumani, chi a civilizzonu un pocu, denduli strade inchiappellate, alzendu monumenti utili e grandiosi, imparenduli a cultura di u granu, ecc...

Aleria e Mariana funu e duie più pupulate e più impurtante città di a Corsica.

E vecchie munete, l'ogetti, e i sluvigli chi ci si trova ancu avale, scavendu a terra, ne so a prova più evidente.

Intornu a parecchie surgente minerale o termale, si vedenu sempre e vistigie d'i travagli culussali fatti da su populu, chi avia messu a pratica di e regule di l'igiene, a u rangu di e più belle vertu.

U filosofu Seneca, chi fu esiliatu in Corsica per ott'anni, un truvenduci jente culte come in Roma, e azezzu d'esse privatu di e cumudità di a vita, scrisse contru u paese e contru l'abitenti.

## III

## U CRISTIANESIMU IN CORSICA

U cristianesimu ebbe una bona influenza sopra u carattere e i costumi un pocu barbari d'i nostri antichi.

Fu predicatu in Corsica, si crede, fin da u primu seculu di a nostr'era. U populu accettò cum entusiasmu a nova religionè, e in l'annu 303, durentu e persecuzione, e sottu Dioclezianu, a nostra cumpatriotta santa Divota, fu martirizzata, a Mariana. Più tardi, a Cartaginese, o siasi a Rumana, santa Julia, riceverà a palma di u martiriu, a Nonza.

A duminazione bizantina fu di e più crudele pe i Corsi. Mediante solli, si pudia ottene tuttu, ancu l'impunità di più gran delitti. I pagani stessi, per danaru, eranu autorizzati a esercità i so riti. A miseria era junta a un puntu tale, chi, dice san Gregoriu u Grande, per pagà i so impositi, i Corsi eranu obligati a vende perfinu i so figlioli.

Da u quintu all'ottesimu seculu, i Vandali, i Goti, i Lombardi, e i Sarracini, fecenu sente a i Corsi u pesu di e so incursione e di a so più tiranna duminazione.

St'ultimi lascionu traccie di u so passagiu in l'isula, e ancu avale, nun sulamente c'è loghi chi portanu u nome di : *Funtana a i Mori*, *Moracciasca*, ecc..., ma c'è ancu un pocu pertuttu, discendenti di sta razza facile a ricunoscesi a la pella umbule e bruna, e labre grosse, i capelli ricciulini, ecc... 13

## IV

## I CORSI SOTTU CARLUMAGNA :-: A FEODALITA

E truppe di u re Peppinu, e più tardi quelle di u so figliolu Carlumagna, battenu i Sarracini in di e vicinanze di Mariana e d'Aleria, e s'impadruniscenu di l'isula.

A città di Bonifaziu fu fundata pocu tempu dopu, da u Conte di Toscana, Bonifaziu.

Cu a nova amministrazione, a feodalità piglia pede in Corsica, e ci si manterà putente, autoritaria, e guasi sempre oppressiva.

Unu d'i più spietati di si Signori, fu Orsu Alamannu di Frettu, regione a poca distanza di Portuvecchiu e di Bonifaziu. Impose a la pupolazione legge crudele e abuminevule, fra e quale quella di un dirittu diabolicu sopra u matrimoniu.

Ma un giovanu, curaggiosu e squaltru, Piobbeta, strangulò stu mostu, c'un lacciu di funa, e cusi liberò a so innamorata, e tutte l'altre giovine, da un usu barbaru e vergunosu.

Arrigu Bel Messere, u più chi amò u populu in quelli tempi, dete un pocu di pace e di benessere a i povari Corsi ; ma quandu fu assassinatu, u disordine ripigliò, e a voce publica pretende chi s'intese per tutta a Corsica una voce chi gridava per aria :

« E'mortu u Conte Arrigu Bel Messere,

« E Corsica sarà di male in pighiu ».

A guerra civile schiattò per tutte e pieve, e passò suminendu doli, miseria, e odiu tenace.

Simu a una di e periode più triste di a nostra storia. U populu un pudendune più, si rivolta contru i so scio, o *Signori*, chi un sanu ne ponu più difendeli e so case, prutegge e so raccolte, ne falli rispezzà moglie e figliole.

## V

## A CORSICA SOTTU I PAPA E SOTTU I PISANI

Formosu, originariu di Vivariu, cinse a tiara papale in 892, e prima cume dopu, i papa vurranu dispone a so modu di a Corsica, pretendendu chi Carlumagna e u so babbu Peppinu, l'avianu cedutu i so diritti di cunquista.

In 1077, u papa Gregoriu VII, cedi si pretesi diritti a l'arcivescu di Pisa, Landolfu, a cundizione di sparte insieme i rivenuti.

A Corsica fu allora spartita in <sup>cinque</sup> diocesi : Mariana, Nebbiu, Aleria, Accia, Ajacciu, e Sagona.

U cleru ottenne grande stensive di terrenu ch'ellu messe in cultura, e imparò ancu all'altri a suminà granu e orzu, e a piantà vigna. Fu cosa li fece guadagnà un pocu di più a cunfidanza di u populu.

Sottu u governu pisanu a pace regnò, e a Corsica cunobbe un pocu di benessere e di tranquillità.

Parechie chiese d'una custruttura speciale funu fabricate, e ne cunservemu anch'oghie une poche cume monumenti storici : San Michele di Muratu ; a cattedrale di u Nebbiu, a San-Fiorenzu ; a Canonica di Mariana, inaugurata in 1119 ; a chiesa di Carbini ; quella di santa Cristina di Campuloru ; quella d'Aregnu, inaugurata in 1179, ecc...

## VI

## TERRE DEL COMUNE

U benessere chi a duminazione pisana avia datu a i Corsi, fu di poca durata. A guerra civile ripigliò per ogni locu.

A setta pulitica-religiosa d'i Giovannali (1354), chi vulia mette tuttu in cumunu, ghiente e roba, fu scumunicata da u papa Nucenziu VI, perseguitata cun accanimentu cume eretica, e distrutta spietatamente in di a pieve d'Alisgiani, in 1361.

A famiglia d'i Cinarchesi, ch'era una di e più putente, vulia imponesi per forza. I baroni di l'isula, e u populu, si messenu d'acc...

cordu, e tennenu una Dieta o Assemblea generale a Merusaglia, a prima chi si vide in Corsica.

Sambucucciu d'Alandu, numinatu Tenente-Generale di a nazione, obligò u Conte di Cinarca a rientre in di e so terre, e organizzò sottu u nome di *Terre del Comune*, u territoriu di u di quà da i Monti, compresu fra Aleria, Calvi, e Brandu.

Ogni pieve — o cantone — ebbe u so Podestà (merru), i so *Padri del Comune* (cunsiglieri municipali), u so *Caporale* (ghiudice o capu di a pieve), e i *Dodeci* (cunsigliu supreme chi promulgava e legge e ghiudicava sopra l'altri), tutti eletti da u populu.

Fu pe a Corsica un'era di tranquillità e di bundanza, e pare un miraculu di vede chi a justizia fussi cusi ben'accolta in st'isula, in quelli tempi di torbidi e di prufonda ignuranza pertuttu.

U nome di Sambucucciu sarà sempre caru a i Corsi, pe i quali è un simbulu di libertà e d'indipendenza. Fu Sambucucciu, u primu, chi signò un cuntrattu d'amicizia cu i Jenuvesi.

## VII

### I CAPORALI CORSI

A la morte di Sambucucciu, a feodalità si discitarà, e le lutte ch'ella sustenerà più accanite che mai, purtaranu desolazione e ruina dapertuttu.

Ogni pieve, per difendesi contru l'esigenze d'i Signori, scelse unu fra i più potenti e li dete u nome di *Caporale*.

Ma questu, più tardi, invece di sustene l'interessi di u populu, cum'era u so duvere, circò a impone a so duminazione, e fu guasi sempre in guerra contru i so vicini e ancu cu i membri stessi di a so famiglia. Fu pe a Corsica, un flagellu di più chi s'agghiunse a tant'altri.

Molte famiglie di si *Caporali* diventeranu a pocu a pocu potente, luttendu a quandu in favore, a quandu contru l'oppressori di a patria, i Jenuvesi.

Fra tanti, Giudice della Rocca (Sinucellu), malgradu u so carattere troppu sanguinariu, si fece rimercà, tantu pe u so coraggio, che pe a justizia rigurosa e severa ch'ellu rendia. A so vita

fu una lotta cuntinua per mantene a duminazione pisana in Corsica, contru quella di Jenua chi s'infiltrava a pocu a pocu in d'i nostri loghi.

Traditu da u so figliolu naturale Salnese, Giudice della Rocca fu purtatu in di a prigione Malapaga, a Ghjenua, duv'ellu muri quattr'anni dopu all'età di 91 annu (1312).

Pisa sarà ormai imputente a pudessi mantene in l'isula, e nisuna intervezione efficace d'a so parte sarà più pussibile.

## VIII

### L'ARAGUNESI IN CORSICA

Videndu ch'i Pisani so scacciati di Corsica da i Jenuvesi, u papa Bonifaziu VIII, cede all'Aragunesi i so diritti sopra st'isula, mediante a soma di dui centu marchi d'argentu per annu.

Malgradu ogni sorte di sforzu, e appughiendosi sempre sopra qualchi capazzone còrsu, l'Aragunesi un si puderanu mantene che un certu tempu in di u dilà da i Monti, ma un abandonaranu tutta speranza, o velleità d'occupazione, che in 1559.

Vincentellu d'Istria, apparentatu a e principale famiglie còrse, fu numinatu vicirè di l'isula, da Alfonsu V, re d'Aragona.

U vicirè sbarca in Corsica, batte dapertuttu i Jenuvesi, s'impadrunisce di Calvi, ma un pobbè piglià a città di Bonifaziu. L'isula è guasi tutta cunquistata. Vincentellu l'amministra cun imparzialità e cun ghiustizia, e face di Biguglia a so capitale.

Allora l'orgogliu u piglia di vulella guvernà per so contu, e impone a tutti una cuntribuzione straordinaria. Videndu chi u populu e i Signori li resistenu, Vincentellu si mostra assai crudele e si stabilisce in d'un forte inespugnabile ch'ellu s'avia fattu fà a Corti.

Dopu essesi resu esecrabile cun tutti, fu fattu prigiuneru, e messu manu a i Jenuvesi chi u purtonu a Ghjenua duve li taglionu u capu.

I Corsi hanu cunservatu un bon ricordiu di l'amministrazione aragunese.

## IX

## A DUMINAZIONE JENUVESE

I Jenuvesi, nimichi furibondi d'i Pisani, principianu per impadrunissi di Bonifaziu.

Più tardi, guadagnanu a battaglia navale di a Meloria (1284), e i caccianu a pocu a pocu di tutta l'isula, furzendu i Còrsi a ricunosce a so duminazione (1347).

Allora principionu pe a Corsica e lutte gigantesche e a resistenza accanita. Ne l'oru di a Banca di San-Ghiorghiu, ne l'esiliu, ne l'assassinamenti, o n'importa a crudeltà d'i mezzi impiegati da i Jenuvesi, nunda pobbè furzà o cunvince i Corsi a una sottumissione voluntaria.

U dilà da i Monti si darà di preferenza all'Aragunesi, d'i quale u governu era assai più dolce, e a duminazione più suppurtevole.

Ghjenua chi vindia a justizia a u più chi a pagava, obligò i Corsi a fassila gratisi da per elli, cosa incuraggi e favorizzò a terribile e spaventosa *Vindetta*.

Arrigu della Rocca, Vincentellu d'Istria, Ghiuvan-Paulu Leca, Rinucciu della Rocca, eppò tanti e tant'altri, difesenu palmu a palmu a terra di Corsica, e guasi tutti casconu sottu i colpi micidiali d'i sicarj jenuvesi.

I Corsi, attaccati da tutt'e parte da varie putenze chi vulianu sottumetteli, tennenu una riunione a Lagu-Benedettu, e u populu offrì a Signuria di l'isula a la Banca di San-Ghiorghiu, sucietà commerciale assai impurtante. Ma nunda fu cambiatu a u so tristu statu, chi andava sempre di male in peghiu.

## X

## SAMPIERU CORSU

Quando ogni speranza paria persa pe i Corsi, eccu chi sorte Sampieru Còrsu, nativu di Bastelica.

Su nome ch'era u terrore d'i Jenuvesi, ci scalla sempre u pettu d'amor patriu quandu ci pensemu. U sangue ci corre allora più

bullente p'e vene, ingunfiendu di fiertà, d'amore, e di speranza, u nostru core.

Cun l'ajutu d'i Francesi, Sampieru Còrsu rispigne i nimichi a Vescuvatu, a Tenda, a Caccia, e un li lascia più che a città di Bonifaziu, e quella di Calvi, *semper fidelis* a i Jenuvesi.

U re di Francia, Arrigu II, pruclama subito a riunione di a Corsica a i so Stati. Ma in 1559, a u trattatu di *Cateau Cambresis*, a cede dirnò a i Jenuvesi, e face rientre in Francia u maresciallu de Thermes cun tutte e so truppe. L'Aragunesi l'avianu digià datu l'esempiu.

Sampieru Còrsu chi un vòle sottumettesi a i Jenuvesi, un perde curaggiu. Si lampa in Algeri, a Tunisi, a Custantinopoli, e in altre capitale di l'Auropa, per dumandà ajutu e prutezzione in favore di u so paese. Ma nimu si lascia cummòve.

In su fra tempu, a so moglie Vannina, di a nobile famiglia d'Ornanu, u tradisce, vulendusi rifugià cu i so figlioli in Ghjenua, per trattà, malgradu a vuluntà di u so maritu, cu a Serenissima Republica. Ma un amicu di Sampieru, Antoniu di San-Fiurenzu, li riesce a catturà u bastimentu chi a purtava, prima ch'ell'entrassi in l'acque jenuvese.

A u so riturnu, Sampieru vindicò a patria tradita, strangulendu eu e so proprie mane a so sciaurata cunsorte ch'ellu amava tantu. A Patria deve passà avanti tuttu.

## XI

Pocu tempu dopu, Sampieru Còrsu sbarca all'Arinella — a duie o tre leghe a u sud di Bastia — cun trenta-sette omi d'i so più fidati. A forza d'energia li riesce a ravivà in ogni core l'amore di a patria, e lotta cun vantaggiu dapertuttu. Traspurtatusi in di u dilà da i Monti, e so truppe so abbastanza numerose per esse una minaccia contru a città d'Ajacciu, occupata da u nimicu.

I Jenuvesi videndusi persi, si ne sbarrazzonu, fendulu assassina da Vittulu, accumpagnatu da parecchj membri di a famiglia d'Ornanu, u 17 jennaghju 1567.



Alfonso d'Ornanu, figliolu di Sampieru Còrsu, fu subito ricunuscitu per capu, da più di tre mila Còrsi riuniti in Assemblea, a Orezza. Un avia che 18 anni, e li mancava a sperienza, i talenti militari, e l'indumabile energia di u so babbu.

Ma dui partiti, i Rossi e i Negri — cume dui cent'anni nenzu, i Casgiunacci e i Ristagnacci — insanguinavanu a Corsica, sustenuti a quandu unu a quandu l'altu, da i Jenuvesi, chi spigulavanu sopra e so nimicizie.

Alfonso d'Ornanu, videndu l'impussibilità di pudè cuntinuà a lotta, trattò cu i Jenuvesi, e ottenne cundizione assai vantaggiose pe i Còrsi.

Accompagnatu da più di tre centu d'i so partigiani, rientre in Francia duve l'aspettavanu i più grandi onori a la Corte di u re. Arrigu IV, u numinò maresciallu di Francia, e governatore di a Gujena.

In quelli tempi, Giovanni della Grossa, Monteggiani, Ceccaldi, Filippini, e Pietro Cirneo, so i primi storici, o piuttosto cronicista di a Corsica.

## XII

### TEMPI BUGHJ DI A CORSICA

Durente 160 anni, i Jenuvesi funu padroni assoluti di a nostr' isula. Un Còrsu un pudia più esse ne ghiudice, ne nutaru, ne ufficiale, e un pudia riempie nisuna funzione elettiva in di u so paese.

Ghjenua esultava... e inviava, guasi sempre, tutti i so nobili più scanati e più miseriosi, a rifassi in d'i nostri loghi, spulpenduci finu all'ossu.

Un gran numaru di Còrsi, un pudendu supportà un governu cusi oppressore, andetenu a serve in l'ermate francese, taliane, veneziane, spagnole, duve guasi tutti si so illustrati, acquistendu gloria, onori, e ricchezze.

In quelli tempi, a Corsica ha datu *dey* o *bey* a Tunisi e a Algeri (Lazzaru, Tavera), difensori a la città di Marsiglia (Petru Libertà), omi celebri a la Spagna (Gaspari, ecc...) e a Venezia (Giustiniani, bracciu di ferru, Franceschi, ecc...), ecc...

Un velu densu còpre sa perioda di a nostra storia — 1570-1729 — chi un c'è svelata che a pocu a pocu, da l'archivi jenuvesi, pe i quali documenti a nostra cunfidanza un pò esse — e cun ragione — che tuttaffattu limitata...

Ancu prima di Sampieru Còrsu, sottu i re Carlu VIII, Luigi XII, e Francescu I, molti Còrsi s'eranu stabiliti in Francia, e funu anubiliti da si re : Alfonso, chi s'illustrò a la battaglia di Fornovu; Orsu-Santu Cipriani, Antone Lenchi, ecc...

In 1676, una culonia di Greci, inviata da i Jenuvesi, ghiunse a stabilissi a Paomia, e fundò, più tardi, a città di Cargese.

## XIII

### A GUERRA DI L'INDIPENDENZA

In 1729, u bacinu essendu colmu, sbucciò. A la voce di u vecchiu Lanfranchi, dettu Cardone, di Boziu, u populu si rivultò e ricusò di pagà l'impositi a Ghjenua.

Giafferi e Ceccaldi funu pruclamati generali d'i Còrsi, e corsenu, dopu essesi impadruniti di Furiani, e di qualchi forte all'intornu, a fà l'assediu di Bastia, chi si seppe difende malgradu u timor panicu ch'avebbe u governatore.

A guerra contru l'oppressori fu battizzata e pruclamata *Guerra leghjattima e santa*, da un'Assemblea di teologhi riunita in Orezza. I Còrsi s'impadrunicenu di San-Fiorenzu e d'altri paesi.

Davanti a sti successi, i Jenuvesi si scuragginu e chiamonu a u so succorsu l'Imperatore d'Austria, u quale inviò quatru mila Tedeschi chi funu battuti a San-Pellegrinu.

Altrettanti ne turnò a sbarcà, ma si fecenu frustà a Calenzana, e l'ondecim maghiu 1732, i Corsi ottennenu un trattatu chi l'era assai favurevule.

Cume sempre i Jenuvesi rumpinu i patti prima di l'ora, e attacconu i Corsi all'isbenuta. L'abbate Urticoni un pòbbe ottene l'appogghiu di u re di Spagna, e nisuna putenza fece sente a so voce in nostru favore. Ma i Corsi un si persenu ne di curagghiu ne di speranza.

## XIV

## TEODORU I, RE DI CORSICA

I patrioti corsi andavanu forse a succombe, quandu un avventurieru, Teodoru di Neuhoff, li prumisse u so cuncorsu in roba e in danari, s'elli l'eleghianu re di a Corsica. Era sbarcatu in piaghia d'Aleria c'un bastimentu carcu a granu, erme a focu, munizione d'ogni sorte, scherpi, pannamenti, viveri, e derrate. Fece una distribuzione di tuttu, e ancu di danaru.

Pruclamatu re a u conventu d'Alisgiani, u 15 aprile 1736, Teodoru I, fu per un pocu a pruvidenza di a Corsica. Organizò a la lesta un'ermata regolare, e li distribuì munete ch'ellu fece fà c'u ramu chi li purtò a pupulazione.

E so risorse essendu finite prestu — avia una corte chi vulia ranghiglia cun quelle d'i suvrani più putenti — ecculu partitu in cerca d'altri ajuti. Ma cume si ne junse a mane biote, fu obligatu, dopu avè tentatu a sorte per duie volte, d'alluntanassi per sempre di e rive incantevule e cusi ospitaliere di a Corsica.

U putere di su re, era limitatu da una Custituzione, e cuntrullatu da un Cunsigliu Supreme, cumpostu di 22 membri, scelti fra i persunaggi più influenti e più struifi di l'isula.

U so regnu d'ottu mesi fu pe a Corsica cume un splendore d'alba chiara chi prumettia una bella jurnata, dopu tante nuttate cusi tenebrose chi Ghjenua facia pisà sopr'a sfortunata Corsica.

Benchè u gestu di u re Teodoru fussi interessatu, e malgradu a so vita cusi turmintata e piena d'avventure d'ogni sorte, i Corsi cunservaranu sempre d'ellu piuttostu un bon ricordiu : A nazione corsa s'era pussuta affirmà all'occhj d'un'Auropa più indifferente, forse, ch'egoista.

Molte famiglie anubilate da Teodoru, hanu cunservatu u so titulu, o li fu cunfirmatu più tardi da u re di Francia, Luigi XV.

## XV

## GHJENUA DUMANDA L'AJUTU D'I FRANCESI

Gaffori e Ghjacintu Paoli cuntinuonu cun qualchi successu, a lotta. A Republica di Jenua la Superba, è ridotta a implurà l'ajutu di a Francia.

Ma l'ufficiali francesi chi sbarcanu in Corsica circaranu piuttostu a rendesi simpatichi e utili a i patrioti, accurdenduli favori, e denduli spessu ragiò contru i so nimichi. Era per fà vede quantu a Francia tenia a la justizia, e quantu amava e stimava u populu còrsu.

I Còrsi lutaranu allora cun onore ma cun poca speranza di successu, benchè u generale marchese de Cursay, sia accusatu — a tortu — di tradimentu da u governatore jenuvese.

De Cursay amava i Corsi p'e so bone qualità e pe i sentimenti nobili chi li ricunoscia. Un pudia ammette ch'elli fussinu sottu a sferza di un populu cusi venale, e chi un tenia nisun contu d'i so diritti.

Fundò in Bastia una sucietà litteraria « l'Accademia d'i Vagabondi », per incuraggi e eccità l'emulazione di a giuventù in di a cultura di e belle-lettere.

E'pruvata ch'ellu nutria a speranza d'esse un ghiornu re di a Corsica.

Gaffori, numinatu generale in capu di a nazione, era u spaventu di u nimicu, chi u fece assassinà in 1753.

Durentu dui anni, un governu di cinque Direttori cuntinua a guvernà e a guerriglia contru Jenua. Ma i Corsi preferinu u cumandu d'unu solu a un putere sperpegliatu chi un rendia personalmente rispunsivule a nisunu.

## XVI

## PASQUALE PAOLI : A SO AMMINISTRAZIONE

Pasquale Paoli, figliolu di Jacintu, fu chiamatu d'Italia duv'ell'era ufficiale in l'ermata di u re di Napuli, e pruclamatu generale in

capu d'i Corsi, da la Cunsulta tenuta a u cunventu di Sant'Antone di a Casabianca, u 15 lugliu 1755.

Avia trent'anni appena. Scularu di u celebre filosofu Genovesi, Paoli avia prufittatu di e lezzione di su gran ecunumista, ammiratore di Voltaire e di Rousseau.

In pocu tempu i Jenuvesi funu vinti, e u so rivale, Matra — un Còrsu di u partitu jenuvese — tombu, all'azzuffu di u cunventu di Boziu.

Un governu regulare fu stabilitu in l'isula, e di a so amministrazione n'era cuntentu ognunu.

Paoli fundò l'Università di Corti, e altre scòle ; organizzò a justizia, castigò severamente i culpevuli, dete una custituzione amirevule e liberale a i Còrsi, fundò una Zecca a Muratu, una stamperia naziunale a Oletta, eppò a Campuloru e a Corti ; rinfurzi e se milizie, dete una forte impulsione a u cumerciu e all'industria, e rese a justizia a tutti pari : a justizia paolina, severa sì, ma imparziale e incorruttibile.

L'ordine fu ristabilitu, a cunfidanza rivenne, e l'isula diventata una repubblica libera e putente, prusperò.

## XVII

### A NAZIONE CORSA

I Còrsi eranu felici sottu un governu cusi pupulare.

U murale di a cuscenza publica s'alzò — s'ell'un lu superò — a u nivellu di quellu di e nazione più civilizzate.

U filosofu J.-J. Rousseau, incantatu di vede una pupolazione cusi avida di libertà e di justizia, avia l'intenzione di vene a stabilissi in Corsica, per dà una custituzione a un populu libaru, degnu di Sparte e d'Atene.

Fu prufeta dicendu : « Aghiu qualchi presentimentu chi un ghiornu st'isuluccia maravigliarà l'Auropa ».

Ancu Voltaire ammirava u curaggiu d'i Corsi, e avia a Pasquale Paoli in alta stima.

U populu còrsu, ricunuscente di tantu bè fattu a u so paese, e di l'alta riputazione ch'ell'avia acquistatu in Auropa, dete a Paoli u nome cusi bellu di : « Babbu di a Patria ».

A guerra contru i Jenuvesi fu cundotta cun vigore e celerità. U nimicu fu ridottu dapertuttu. Achille Murati cunquistò l'isula di Capraja chi appartenia a i Jenuvesi. Una piccula flotta di guerra fu creata per protette e per difende e nostre coste.

L'entusiasmù era generale, e a patria còrsa, dopu tanti seculi, s'era infine ritruvata, cu a so Custituzione, u so governu, e a so bandera.

Si vede francamente chi l'anima di a patria un pò more, perchè a Patria còrsa si discitò ancu dopu tanti seculi di schiavitù.

E donne còrse detenu anch'elle — cume d'altronde in tutti i tempi — prove di u più gran patriuttisimu : Faustina Gaffori, a veduva Cervoni, quella di Rennu, ecc...

## XVIII

### A CORSICA CEDUTA A I FRANCESI

Un pudendusì più mantene in l'isula, i Jenuvesi cedinu a Corsica a la Francia, u 15 maghiu 1768, pe u trattatu di *Versailles*. Ma i Corsi chi un dipendianu più da nisunu, si preparonu a difende u so reghione, e a so indipendenza.

U generale Chauvelin sbarcò cun truppe scelte, e s'impadrinò d'i pesti impurtanti di u Nebbiu, di u Capu-Corsu, e di a Casinca.

A battaglia di u Borgu fu un gran successu e un incuraggiamentu pe i Corsi ; sulamente un fu seguitata d'altre vittorie cusi impurtante.

I Francesi si ritironu in Bastia, e qualchi tempu dopu u generale De Vaux, sbarca cun più di vinti mila sullati agguerriti, appughiatu cun bundanza di cavalleria, artiglieria, munizione e eramenti d'ogni sorte.

Barbaggiu, San-Fiorenzu, e Oletta funu subito occupati, e, da una parte cume da l'altra, e dispusizione chi si piglianu, indicanu chi s'è a la vigilia di grandi evenimenti.

Cume si vedenu i topi e i gatti abandonà un bastimentu quand'è per affundassi ; i rospi, e bucertule, e altri animaluzzi, fughie di e so tane e di e pardine, quandu si prepara un terramotu, o s'annuncia un gran tempurale, cusi s'è vistu uni pochi di Còrsi, abandonà babbi, fratelli e parenti — a patria, infine —, e andassine cun l'avversari, pretestendu a più vulgaria di e scuse : chi a resistenza era impussibile contru una nazione cusi ricca e cusi potente.

Ma furtunatamente chi, pe u decoru di u patriuttisimu còrsu, quessi un funu che un'infima minorità.

## XIX

## RESISTENZA D'I CORSI

Tutti l'omi, e i giovani validi, da 16 a 60 anni, rispondeu a la chiama di a patria, pe a voce di u *Colombo*, chi rughia, mughia, e riuocca cun strepitu, notte e ghiornu, da un picuzzu all'altru, intrunendu per ogni valle e per ogni cullina.

Paoli ha stabilitu u so quartieru-generale a Muratu, e si prepara a cumbatte contru i sullati più ben'ermati e più agguerriti di u mondu.

E barrette-misgie, zenu e fiaschetti cinti, e cispra a collu, sboccanu da ogni parte in Nebbiu, e piglianu postu, sottu u cumandu d'i so alfieri, o d'i so capitani.

U murale di a popolazione è bunissimu, ma l'intrighi, e l'argumenti stintigliulenti, entrinu in ghiocu. Molti cuncorsi prumessi, o ch'eranu dovuti, manconu a la chiama cusi cummuvente di a Corsica.

E truppe di De Vaux, cu i generali d'Arcambal, Dumouriez, Grand-Maison, d'Ampus, ecc... partenu da Oletta u 3 maghiu 1769, e azzuffanu e milizie corse, chi so rispinte u 4, u 5, e u 6, a Olmeta-di-Tuda, bocca a Millaja, Vallecalle, Rapale, e messe in disordine u 7 maghiu, a u campu di San-Niculaiu, sopr'a Pieve, malgradu i sforzi d'i patrioti corsi, e d'i capitani Colle, Peloni, ecc...

Paoli, ritiratusi in fretta, c'u so Statu-Maggiore, a Merusaglia, cuntinua a dirige l'operazione di a battaglia, ma si rende contu di u periculu chi minaccia l'Indipendenza di u so paese.

## XX

## A DISFATTA DI PONTENOVU

Grimaldi di Caccia, paralizzatu da... prumesse, un difendu più a bocca a Tenda, e Gaffori, immobilizzatu forse p'e stesse ragione, a Ponte-Leccia, un raggiunge micca e so truppe cantunate a Lentu e a Canavaghia.

A situazione d'i patrioti è di e più critiche : di u risultatu di a lotta dipenderà u Destinu di a Patria còrsa.

E truppe francese sbordanu in Custeria pe a bocca a Bigornu, e occupanu senza truvà una resistenza seria, i paesi di Lentu e di Canavaghia, digià travagliati da... l'influenza francese.

I Còrsi so obligati di rinculà davanti a tanti cannoni, chi gumetanu focu e ferraglia in ogni cantu.

Pasquale Paoli, da l'altu di Rascamone, sottu Merusaglia, seguitava, cu l'angoscia a u core, e fase dulurose di a battaglia.

Circa tre mila Còrsi eranu cuncentrati a Pontenovu. Quelli chi cullonu per cumbatte e truppe francese sottu Lentu e Canavaghia, funu rispinti, e perseguitati finu a u locu di a so partanza, e si truvonu mezzu a dui foghi, perchè i patrioti vulianu impedilli di passà u ponte. U tradimentu e a malintesa eranu digià in d'i ranghi d'i Còrsi. A lotta fu sanguinosa e spaventevule.

Malgradu un curaggiu di leoni, i patrioti funu schecciati da truppe assai più agguerrite, più disciplinate, e più volte superiore a le soie. Circa sei centu cadaveri restonu ammassati nantu quellu ponte ormai fatale, o funu trescinati in l'acque scumacciulose, e rosse a sangue, di u Golu.

L'indipendenza còrsa s'affugò cun s'Eroi, e Pasquale Paoli, per disparmià altri desastri a u so paese — a resistenza era diventata impussibile — s'imbarcò u 13 jugnu, a Portuvecchiu, cun tre centu passati d'i so più fidati partigiani.

Da Livornu, duv'ellu sbarcò, si n'andete in Inghilterra, a Londra, acclamatu e applaudidu daperluttu, tantu in Italia che in Ale magna.

## XXI

## A CORSICA FRANCESE

A Francia cerca a cuntentà i capazzoni còrsi, denduli impieghi, vantaggi, e onori, e accettendu i so figlioli in di e scòle di u governu.

A De Vaux succede u Conte de Marbeuf chi governa cun prudenza, benchè sia accusatu un pocu di parzialità. Riesce a fà amà a Francia, circhendu a fà sallà a u più prestu e piaghe, e a calmà certe scuntentezze ch'avìa furzatamente lasciatu appressu ad'ella, a guerra di cunquista.

U cumerciu, l'industria, e ancu l'arte, funu incuraggiti ; molte strade funu aperte, e ancu tandu, si parlò d'assanè e nostre piaghie, dissicchendu e padule. Ma i prugetti, i rapporti, e a bona volontà, so inefficaci, s'elli un so accumpagnati da u nerbu di a guerra, chi ghiè u danaru.

A Corsica fu spartita in 9 giuridizione, c'un tribunale di prima istanza in ognuna. A Corte d'Appellu fu in Bastia. U portu di l'Erme a focu, fu difesu ; e legge francese rimpiezzonu quelle più pupulare di Paoli.

U 30 novembre 1789, a la dumanda di a rapresentazione còrsa, e all'applausi di l'Assemblea Naziunale Custituente, a l'unanimità, a nostr'isula è dichiarata e ricunusciuta come parte integrante di a Francia.

Pasquale Paoli, chiamatu da l'esiliu, acclamatu e festighiatu a la tribuna di a Camera francese, riturnò in Corsica, duve fu numinatu, a la cuntentezza di tutti, Tenente-Generale.

Quandu sbarcò in Capu-Corsu, si lampò in dinocchie, basgiò a terra e disse : « O la mio Patria, t'aghju lasciatu schiava, e ti ritrovu libera ».

## XXII

## L'INGLESI IN CORSICA

Sottu u governu rivuluziunariu di u Terrore, Paoli, invidiatu, e accusatu a tortu di tradimentu, chiama l'Inglesi in Corsica, piuttosto che andà a sustene a so innucenza davanti a Cunvenzione.

U generale inglese, Sir Gilbertu Elliot, fu numinatu vicirè, e durentu circa dui anni, guvernò l'isula, assistitu da un Cunsigliu supreme.

Molte scuntentezze si producianu spessu spessu, e l'Inglesi funu cacciati di Corsica in 1796. I Francesi i rimpiezzonu subitu, e dipoi l'unione cu i Còrsi fu cumpletta e sincera.

Paoli, chi un era d'accordu c'u vicirè, era statu chiamatu a Londra, in 1795. Ci restò finu a la so morte, chi avrebbe locu in 1807. Benchè ospite di l'Inglesi, e pensiunatu da su governu, un mancò mai d'alluminà u so palazzu in segnu d'allegria a ogni vittoria di u generale Bonaparte, o di Napulione.

Per testamentu, Paoli ha lasciatu tuttu ciocch'ellu pussedia a la Corsica. U so nome è, e sarà sempre pupulare in stu paese. E in di e capanne più tenue, come in di e case più ricche, si racuntarà sempre, a sera, in di e veghie d'invernu, e lutte ch'ell'ha sustenutu per l'indipendenza di a so patria, e si rammintarà tuttu u bè ch'ell'ha fattu, e a gloria e u benessere ch'ell'ha datu a u so paese.

E so cennere funu purtate in Merusaglia in 1889, e riposanu a la Stretta, in di a cappella di a so casa paterna, ch'è divenuta un locu di divuzione e di pellegrinaggiu pe i passianati di a libertà, e di a patria còrsa, come per l'ammiratori di u : Babbu di a Patria.

## XXIII

## CORSICA E FRANCIA

E' più di un seculu e mezzu chi a storia di a Corsica si cunfonde cun quella di a Francia. Per cunsequenza u nostru travagliu finisce, e qui ci arrestemu.

Un fu l'attu di cessione chi ci fece Francesi. No. Ma e simpatie chi ci hanu sempre attiratu versu su populu eroicu e generòsu ; e forse, ancu, pe a più gran parte, a gloria cusi splendurente chi li dete unu d'i nostri : Napulione !

St'omu straordinariu, assai più grande che Annibale, Cesare, e Alessandru u Grande, è natu in Ajacciu u 15 agostu 1769, tre mesi dopu chi st'isula era francese. A so storia — ch'ogni Còrsu deve

cunosce — pare fabulosa a forza d'esse grande ; e u so nome risona daperluttu sempre più forte, a misura chi u tempu l'alluntana da noi...

U pattu cu a Francia, i Corsi l'hanu suggillatu più volte, cun tantu sangue generosu versatu voluntariamente in cumunu, sempre pe u Dirittu, l'Onore, e la Justizia.

E millaje di Còrsi si so illustrati, e s'illustranu anch'oghie, in tutte l'amministrazione : in l'ermata, l'insignamentu, a magistratura, ecc... e perfinu ancu fra i membri stessi di u Guvernu.

A lingua corsa — l'anima di u nostru paese — averà sempre a piazza d'onore in d'i nostri reghioni. E speremu chi prestu sarà imparata in di e nostre scòle, accantu a la lingua francese.

I martiri di Pontenovu riposanu ormai in pace, perchè hanu vistu alzà, accantu a su ponte, a croce di u ricordiu : u 3 agostu 1925.

A Francia un pò vede che cun piacè a manifestazione di sti sentimenti cusi ludevuli, chi c'ingonfianu di un nobile orgogliu u nostru core, e so a più bella prova d'attaccamentu, di valore, e di patriuttisimu, chi li possamu dà.

A chi onora i so Morti, s'anubilisce.

